

19 SEP 2003

DR MAHATHIR LAKUKAN LAWATAN RASMI TIGA HARI KE SWEDEN

KUALA LUMPUR, 19 Sept (Bernama) -- Perdana Menteri, Datuk Seri Dr Mahathir Mohamad akan melakukan lawatan rasmi tiga hari ke Sweden mulai Isnin ini.

Lawatan atas undangan oleh Perdana Menteri Sweden, Goran Persson itu menggambarkan hubungan rapat dan persahabatan yang akrab antara kedua-dua negara.

Lawatan itu dijangka akan meningkatkan serta mengukuhkan lagi hubungan dua hala dan kerjasama dengan Sweden, menurut Wisma Putra dalam satu kenyataan di sini hari ini.

Dr Mahathir dijadualkan untuk mengadakan perbincangan dua hala dengan rakan sejawatannya mengenai perkara-perkara yang mempunyai kepentingan bersama dan turut mengadakan pertemuan dengan King Carl XVI Gustaf.

Beliau juga akan melawat Karolinska Medical Institute dan Ericsson Complex di Kista serta menemui ketua-ketua industri Sweden dan menghadiri majlis makan malam anjuran Investor AB.

Perdana Menteri akan diiringi oleh beberapa menteri, pegawai-pegawai kanan kerajaan dan beberapa anggota sektor swasta serta media.

Ini merupakan lawatan Perdana Menteri yang kedua ke Sweden, yang pertama adalah pada tahun 1985.

-- BERNAMA

MUN AZH